



## Uras d'avertura deponia Igniu

*Deponia da verd*

**Sonda, ils 25 da november 2023** ei per uonn il davos di da menaschi dalla deponia da verd ad Igniu.

Per dar alla populaziun era duront igl unviern la pusseivladad da dismetter pigns quatoms da curdems verds vegn construïu in access che meina dad ina scala sin ina plattaforma. Naven da leu haveis Vus la pusseivladad da better giuaden ils curdems verds. Igl access ei signalisau. Tenor situaziun da neiv ei igl access mintgamai rumiaus dalla neiv il mardis suentermiezdi e la gievgia suentermiezdi. Igl access ei mo pusseivels a pei. Nus supplichein da dismetter mo uorden che s'auda els curdems verds!

*Rimnada da plastic*

Il container per la rimnada da plastic sesanfla duront il temps d'unviern sper il baghetg economic da vischnaunca ad Igniu. Mintgamai l'emprema mesjamna dil meins naven dallas 08.00 – 18.00 uras san ils sacs da plastic vegnir dismiss el container.

Ulteriuras informaziuns ein disponiblas sin la pagina d'internet [www.sumvitg.ch](http://www.sumvitg.ch). Per damondas stat l'administraziun communal bugen a Vossa disposiziun (tel.: 081 920 25 00).

Sumvitg, 17-11-2023

*Departament ambient*

## Donaziun fundaziun Greina

Sebasond sin art. 5 dil reglament pertuccont diever dalla donaziun fundaziun svizra per la tgira dalla cuntrada ston damondas per ina contribuziun vid in project vegnir inoltradas alla cumissiun Greina entochen ils 30 da november 2023 digl onn precedent cul formular corrispondent tier l'administraziun communal.

Nus supplichein per notizia da quest avis.

Sumvitg, 17-11-2023

*Cumissiun Greina*

## Di dallas portas aviartas egl Archiv cultural Sumvitg

**Dumengia, ils 3 da december 2023** a partir dallas 13.00 entochen allas 16.00 en casa da scola a Surrein. Igl archiv cultural Sumvitg envida tut tgi che ha interess, era interessai d'ordeifer la vischnaunca da Sumvitg, da vegnir a Surrein e prender investa da quei e tschei che ha anflau la via egl archiv. Ei vegn era mussau films e fotografias ed ina stiva da caffè envida da star in mument tier ina paterlada sur da temps vargai. Tgi che vul surdar quei di ina ni l'autra caussa agl archiv, sa bugen far quei. A bien seveser!

## Sera d'advent sin plaz Cadruvi a Sumvitg

Igl 1. december 2023 allas 19.00 ha liug a Sumvitg sil plaz Cadruvi la sera d'advent. Ei vegn purschii in pign program da divertiment ed era la «Steila da Sumvitg» vegn puspei surdada ad enzatgi per lur engaschi en favur da nossa cuminonza. Ensemen cun l'uniun da dunnas VINAVON selegrein nus sin vossa viseta! Cordialmein envida *SumvitgViva*

## **Uniuns da dunnas e Cussegl pastoral Sumvitg**

Caras senioras e cars seniors. nus envidein vus cordialmein da prender part al survetsch divin cun s. jeli ella baselgia da Surrein **gievia, ils 23 da november 2023** allas 10.30. Silsunter essas vus envidai dallas uniuns da dunnas tier ina sentupada en casa da scola. Vus astgeis guder leu ina gustusa suppa ed in bien dessert. Nezegei pia la caschun da saver dar ina paterlada e schar reviver enqual reminiscenza. Per simplificar l'organisaziun (era pertuccont taxi) essan nus ledas per voss'annunzia entochen sonda, ils 18 da november. Quella astgeis vus far per telefon ni via whatsapp encunter sera a Maya Deplazes, 079 566 62 17 / Daniela Wieland, 076 466 22 08, Gabriela Lutz 078 640 91 12. Nus selegrein sin vus e schein bugen a bien seveser! *Sur Saji e las representantas dallas uniuns da dunnas e dil Cussegl pastoral*

## **Surselva Romontscha**

**Vernissascha dil niev Tschespet «Sut la marella» da Theo Candinas**, venderdis 17-11-23, allas 20.00 en Casa da scola a Surrein (Via Encarden 3). La Surselva Romontscha presenta il niev Tschespet che cuntegn rodund 100 contribuziuns da Theo Candinas aunc buca publicadas ni sternidas per gasettas e periodicas entuorn. La schelta d'essays, raquents, columnas e poesias ha il redactur dil Tschespet Martin Cabalzar cumpletau cun in epilog davart la veta e lavur da Theo Candinas.

Presentaziun e prelecziun da Martin Cabalzar e Petra Rothmund.

Intermezzo musical dil Chor mischedau Surrein

Aperitiv.